

毛

詩

序

說

毛詩序說卷之三

京山郝敬學 男洪範輯

門人彭大翮

侄千里校

鄭

說曰鄭本西周畿內之邑卽今陝西西安府
華州宣王以封其弟友爲鄭桓公桓公爲幽
王司徒死于犬戎之難其子掘突嗣爲武公
與晉文侯定平王于東都亦爲司徒遂併號

鄆之地施舊名于新邑是爲新鄭卽今河南
開封府新鄭縣亦畿內之國也周室東遷鄭
爲輔諸侯無王鄭爲先五霸迭興鄭爲首故
鄭風次王

古序曰緇衣美武公也毛公曰父子并爲周司
徒善於其職國人宜之故美其德以明有國善
善之功焉

說曰鄭武公以諸侯入爲天子大夫繼父職
世濟其美故曰善善言以善繼善也禮大夫

祭服爵弁絲衣色纁朝服皮弁布衣色緇故以緇衣比蓋上之取于下也有布縷以爲衣裳有力役以爲宮室有粟米以爲祿食上仁而下樂輸則三者皆民之情也下不樂而上誅求則三者皆民之怨也武公善其職故詩託言衣與館與粢見民力所自竭于上者惟此而情誼不勝慙歎矣故曰好善莫如緇衣古序曰將仲子刺莊公也毛公曰不勝其母以害其弟弟叔失道而公弗制祭仲諫而公弗聽

小不忍以致大亂焉

說曰朱子改爲淫奔之辭非也詩寓言莊公逆母殺弟之事詳春秋傳蓋莊公殺段之心切于祭仲仲欲早圖而公欲養成故詩人因祭仲之諫托爲莊公拒仲之辭仲子卽祭仲也畏父母諸兄國人云者借莊公之口以誅其心辭若寬而心甚險千載之下讀之如見肺肝詩所以善于諷也若朱子言詩必睚眦怒罵而後謂之刺少涉情致卽斥爲淫奔矣

杞木高。桑木韌。檀木堅。以比公室強。而段無能爲也。

古序曰。叔于田。刺莊公也。毛公曰。叔處于京。繕甲治兵。以出于田。國人說而歸之。

說曰。毛公申言古序所以刺莊公之故。朱子因謂國人愛段而作。非也。莊公縱弟遊蕩。比昵羣小。無賢父兄之教。以陷于大逆。春秋傳所謂鄭志也。詩若美段而志在諷公。但極道其于田飲酒服馬。而公之棄其弟可知。如以

爲國人美段意索然矣。

古序曰：大叔于田，刺莊公也。毛公曰：叔多才而好勇，不義而得衆也。

說曰：朱子改爲鄭人愛段而作，非也。序意與前章同。刺莊公無中才之教，陷其弟于惡也。夫溫文恭儉，人主之美節也。射獵馳騁，狎邪之游行也。段爲君之母弟，夫人之愛子，而無師保之訓，使與羣小田獵飲酒，身親搏獸，控轡馳馬，以爲能事。此何待駢之役，而知其有

將崩之患矣。二詩亟道段材藝武勇繕甲治兵不軌之志。隱然言外。莊公逆知其然而有意養成之。所以不仁也。夫子刪詩存此。戒君父兄之於子弟。愛之不能勿勞耳。若謂鄭人美段而作。何足以風。凡詩諷刺不在多言。前章言巷與市井羣小狎可知。此章言檀謁暴虎粗豪不檢可知。二篇皆叙于田。此名大者。前短章此大篇也。亦以段稱大叔故云。

古序曰。清人刺文公也。毛公曰。高克好利而不

顧其君文公惡而欲遠之不能使高克將兵而禦狄于竟陳其師旅翱翔河上久而不召衆散而歸高克奔陳公子素惡高克進之不以禮文公退之不以道危國亡師之本故作是詩也

說曰按軍旅國之大命人臣有罪不能伸法而以三軍之重羈勒一罪人苟擁衆作亂則危其國率衆出奔則喪其師公子素所以惡之而作是詩也春秋書鄭棄其師與詩錄清人之義正同清河上邑名彭消軸不必皆有

是地彭蠡通樂也。消散也。輞旋也。皆遊嬉之名。詩者聲音之道。諧聲以爲比也。

古序曰。羔裘刺朝也。毛公曰。言古之君子以風其朝焉。

說曰。此詩刺大夫立朝不稱其服。朱子改爲美大夫。蓋誤以彼其之子爲美辭也。凡詩稱彼其者。皆刺之。王風揚之水。衛風汾沮洳。唐風椒聊。曹風侯人。此則託古以諷今。稱賢人以刺不賢人也。言古賢者德稱服。彼其之子。

不然耳

古序曰。遵大路。思君子也。毛公曰。莊公失道。君子去之。國人望思焉。

說曰。按鄭莊公射王幽母。身蒙大惡。左右用事。惟祭仲祝。盱高渠彌之徒。宜君子相率而去也。國人追思桓武之烈。援而止之。欲其不以今惡棄舊好。念先德而惠顧嗣君也。遵大路者。以比率君子之道。願畱而受教也。其志本正。其語音好。濫朱子因改爲男女相悅之。

辭蓋據論語鄭聲淫以槩鄭風諸詩誤也夫所謂淫者鄭之聲耳聲與詩有辨詩志也聲辭也孟子云說詩者不以辭害志是詩志本思君子而辭似婦人語豈可泥辭而改爲淫詩乎朱傳未當然適足以明鄭聲之爲淫耳初學誦之焉能無惑故君子立言崇雅聖人發無邪之旨嚴放鄭之戒有以也其志本正而其辭關理亂烏容廢之所以放鄭聲而不刪鄭詩也

古序曰雞鳴刺不說德也毛公曰陳古義以刺
今不說德而好色也

說曰朱子改爲述賢夫婦相警戒之辭非也
首二章自士曰以下爲夫語婦身勤職業親
賓客保室家不以宴安爲樂也末一章爲婦
答夫相其夫親賢取友尤不以射弋飲酒爲
樂也古之賢夫婦交儆如此今人不然所以
爲刺蓋先有賢夫而後有賢婦士身行道而
後行于妻子女曰雞鳴不過告以寢興之常

期而士曰昧旦則憂其晚矣士之志尤敏于女也射獵在男子中饋在婦人士能勤業故以中饋戒女士不說色而好德故女損服飾以相夫有卷耳進賢之志不獨中饋之脩耳惟有文王而後有后妃有昧旦之士而後有雞鳴之女序曰刺不悅德刺男子也

古序曰有女同車刺忽也毛公曰鄭人刺忽之不昏于齊太子忽嘗有功于齊齊侯請妻之齊女賢而不取卒以無大國之助至于見逐故國

人刺之

說曰朱子改爲淫奔之詩謂忽辭昏非惡見
逐無罪國人無爲刺之非也國人正以忽無
罪見逐而突以大國之助奪嫡苟忽有助何
至于此國人爲忽黨者之見耳未暇論昏
當辭與不當辭也豈得遂改爲淫詩乎

古序曰山有扶蘇刺忽也毛公曰所美非美然
說曰刺忽之所謂君子者非君子也朱子改
爲淫女戲其所私非也扶蘇橋松喻君子之

孤危荷華游龍喻小人之榮寵也詩人傷國
事之非而恨世子之不可輔故爲子都狂童
之比

古序曰擇兮刺忽也毛公曰君弱臣強不倡而
和也

說曰朱子改爲淫女之辭非也誦其詩淒然
有歲寒搖落之感是時忽初立外無重援內
無良輔國人憂孤危而勉其寮友與共濟所
謂倡和云者未知何事味其辭似有去志矣

所以忽終于不振也。

古序曰。狡童刺忽也。毛公曰。不能與賢人圖事。權臣擅命也。

說曰。朱子改爲淫女見絕而戲其人之辭。非也。謂忽以世子逐于權臣。無大罪。不宜國人數刺之。余按鄭忽初卽位之事。無所考。但突以庶子能致外援而得國。豈獨祭仲之力。亦抑忽有不滿于諸侯與國人者矣。故春秋不稱鄭伯書名。不成其爲君也。與詩刺忽之意。

正同朱子疑狡童未可目君聖人未應與之
余按刺忽者多突之黨也忽以嗣君初立席
未煖而見逐突黨狎之無異童子苟不童而
人能攜其有乎箕子麥秀之歌呼紂亦然人
主使國人呼爲狡童其爲君可知矣若以聖
人不刪爲與之詩宜刪不刪者多矣如唐風
椒聊無衣皆篡賊之辭也而錄以志戒豈盡
爲與之乎

古序曰褰裳思見正也毛公曰狂童恣行國人

思大國之正已也

說曰朱子改爲淫女語其所私者之辭非也
蓋鄭突以庶子奪嫡魯宋衛陳蔡助之以入
于櫟而終有鄭國忽孤立被弑以死當時爲
突黨者不獨一祭仲可知此則國人爲突望
諸侯之辭也人情嶮巇如此聖人存之以見
垂統者貽謀爲先繼世者人心爲本鄭初有
叔段後有子突皆背公植黨羽翼成而禍延
累世爲有國者殷鑒甚明不深惟其旨而繫

斥爲淫奔。其可乎。其可乎。○按鄭風如摯兮
狡童褰裳諸篇本慷慨傷時。然皆似婦人艷
語。所謂鄭聲好濫淫志者此也。故曰詩言志
不以辭害志。如以辭而已。鄭詩孰不可爲淫
奔乎。朱傳所以偏執成謬也。

古序曰。丰刺亂也。毛公曰。昏姻之道缺。陽倡而
陰不和。男行而女不隨。

說曰。朱子改爲婦人與男子失期悔而作。非
也。蓋昏禮不明。壻親迎而婦不行。後悔而望。

其復來。女之有二志者也。故詩人刺之。禮坊
記壻親迎見于舅姑。舅姑承女以授壻。恐事
之違也。以此坊民。婦猶有不至者。卽此類也。
如謂與男子失期。是私奔也。豈有私奔其人。
而盛服以待車馬者乎。士昏禮壻親迎。女登
車。姆爲加景。乃驅。景與褰同。加褰衣于禮衣
之上。辟道路風塵也。詩援此禮。以諷失禮者。
男言容貌。女言服飾。誨淫之意也。葛覃歸寧。
衣澣濯之衣而已。婦人從一而言叔伯者。不

貞之辭也。所以爲刺也。

古序曰：東門之墀，刺亂也。毛公曰：男女有不待禮而相奔者也。

說曰：此託爲淫女自言也。東門，城東門，衆所經行也。墀，與壇通，除地曰墀，無防閑之比也。茹蘆，茜也，賤之轉也。茹蘆之言如驢禽行之比，指淫夫也。阪，山岡，以比阻隔也。東門之栗，生于道旁，人所易探踐之言淺也。淺，家室易窺也。

古序曰風雨思君子也毛公曰亂世則思君子不改其度焉

說曰朱子謂詩辭輕佻狎暱非思賢之音改爲淫女風雨之時見所期之人而心悅非也風雨雞鳴猶歲寒松柏之比也若夫輕佻狎暱者鄭之聲也然其志本思君子焉得以辭害志風雨雞鳴亂世慘黯景象以爲心悅亦不倫

古序曰子衿刺學校廢也毛公曰亂世則學校

不脩焉。

說曰朱子謂辭意儇薄施之學校不似改爲淫奔非也若使辭不儇薄何以爲鄭聲乎學子青衿古今皆然同學少年往來嗣音朋徒久要之言也語意儇薄鄭詩皆然皆斥爲淫則舉鄭國君臣師弟朋友莫非淫人所行莫非淫事何以爲國自男女之外豈遂無詩夫子何獨盡取淫人淫事實其所謂鄭聲淫之一語隘且刻矣且淫詩不刪其所刪又何等

詩乎

古序曰揚之水閔無臣也毛公曰君子閔忽之無忠臣良士終以死亡而作是詩也

說曰朱子改爲淫者相謂非也爲此詩者鄭之君子懷忠良之志而傷忽之微弱也國風凡三揚之水皆微弱之比一王風比平王微弱不能令諸侯也一唐風比晉昭侯微弱不能制沃也此篇比鄭昭公微弱不能制突也鄭昭公見奪于突與晉昭侯見奪于沃其

事同故其比同莊公之子四人忽突子儀子
瑩皆以兄弟相殘而忽以伯兄繼世同父解
體竟死于高渠彌之手詩所以謂之終鮮兄
弟傷忽之無助也朱子儻謂其真無兄弟也
而疑其爲非忽乎哉

古序曰出其東門閔亂也毛公曰公子五爭兵
革不息男女相棄民人思保其室家焉

說曰朱子改爲人見淫奔之女而作非也恆
情窮則反本安則思淫鄭當昭厲之際干戈

不息人民離散室家以苟全爲幸雖有東門之遊女而無江漢之求思時使之然也故夫男女之際人之至情也世治則懷春之女誘于吉士世亂則如雲之女匪伊所思若使上無教化則野有死麕亦爲淫奔矣國無亂離則出其東門皆爲義士矣故誦其詩當論其世未可以其辭而已也

古序曰野有蔓草邂逅時也毛公曰君子之澤不下流恩窮於其革男女失時思不期而會焉

說曰朱子改爲男女相遇于野田草露之間而作非也果爾媒穢已甚聖人奚取焉卽其序宜與溱洧同云刺亂何以云思遇時也蓋鄭國多難兵革不息室家流離借男女邂逅比君子遇主也蔓草零露比君澤下流也有美一人比君也家語夫子遇程子欲贈之引此詩教子路豈淫辭而聖人以之教人乎春秋傳鄭子大叔賦此享趙孟趙孟曰吾子之惠也豈淫辭而大享賦之趙孟謝之乎必不

然矣。

古序曰：溱洧，刺亂也。毛公曰：兵革不息，男女相棄，淫風大行，莫之能救焉。

說曰：朱子改爲淫奔者，自叙之辭，非也。蓋詩人暴其事以刺之，如鄘之桑中，云爾。詳述士女相諠，無羞惡之心，所以爲刺，豈必訶斥而後謂之刺歟。

齊

說曰：五霸始鄭，而齊繼之，故次齊。蓋魯旣升

爲頌諸侯無先齊者矣。齊風多魯事，魯無風而于齊可以觀魯矣。聖人蓋微之。

古序曰：雞鳴思賢妃也。毛公曰：哀公荒淫怠慢，故陳賢妃貞女夙夜警戒相成之道焉。

說曰：朱子卽以爲賢妃之辭，非也。齊自太公五傳而哀公荒淫，紀侯譖于周懿王，殺而烹之，故齊之變風始此。思古刺今也。

古序曰：還刺荒也。毛公曰：哀公好田獵，從禽獸而無厭，國人化之，遂成風俗，習于田獵，謂之賢。

閑于馳逐謂之好馬。

說曰。朱子改爲獵者交錯于道路。相稱譽之辭。非也。蓋詩人述民間尚勇好勝之習。見化之所從來耳。時雖霸業未興。而功利誇詐。已有其漸矣。

古序曰。著刺時也。毛公曰。時不親迎也。

說曰。禮惟天子不親迎。諸侯冕而親迎。以下可知也。壻往婦家。奠鴈受女。出升車御輪。乃先歸。俟于大門之外。婦至。揖以入。齊俗壻不

親迎但俟婦于其家故詩人託爲新婦言以刺廢禮而隱約不露以俟之一字寓意苟無序不知其所謂矣

古序曰東方之日刺衰也毛公曰君臣失道男女淫奔不能以禮化也

說曰朱子改爲男女淫奔自作非也東方君方也日月比君臣也男女晨昏私奔君臣政教不立不能明微格姦防之以禮所以爲衰也呼日月詩人矢志之辭彼姝者子指淫女

也在我室爲淫夫自言以發其暗昧之私也
履禮也禮我而求卽也男女各有正禮女求
男賤也稱履所以賤之

古序曰東方未明刺無節也毛公曰朝廷興居
無節號令不時挈壺氏不能掌其職焉

說曰東方比君也未明比君昏也顛倒衣裳
比政令錯亂也不必真有未明徵召之事比
其君興居無節號令不時耳折柳樊圃比朝
政不如農圃之應節識時也興居號令非晨

夜者所得司無所歸咎不敢斥君而求諸摯壺氏所謂敢告僕夫云爾

古序曰南山刺襄公也毛公曰鳥獸之行淫乎其妹大夫遇是惡作詩而去之

說曰魯桓公夫人文姜齊襄公之女弟也未嫁而襄公私之既嫁與桓公俱如齊襄公使人殺桓公于車中事見春秋傳此詩齊大夫刺襄公也南山雄狐比居高而行禽猶衛風之雄雉也亟稱魯道者閭外通闌行人共見

也。亟稱齊女者，明其非齊婦也。冠屨以比有別也。五兩雙綉以比亂倫也。首足同體而冠屨異匹，比同父非配偶也。屨兩而用五，比襄公有婦而亂倫也。冠一而綉雙，比文姜未嫁而有偶也。葛以比其薄也。俗云：種麻夫妻同則易生，以比娶妻也。斧析薪，有判合之義，以比媒妁也。

古序曰：甫田，大夫刺襄公也。毛公曰：無禮義而求大功，不脩德而求諸侯，志大心勞，所以求諸

非其道也。

說曰朱子改爲戒時人厭小務大忽近圖遠是泛無所指也。夫風未有無所指者無所指何以別其爲各國乎。又曰未見其爲刺襄公。夫襄公無禮求大功事見春秋傳卽位之四年師于首止殺鄭子亹轅高渠彌五年遷紀八年滅紀九年伐衛納惠公十二年降邾是年冬遂遇弑此其求大功與諸侯之實跡也何謂未見末章指淫妹之事正未冠笄之時

也。突弁，指爲君以後國君皮弁服也。突而弁，比衣冠而禽獸也。犬自穴出曰突，莠醜也。草名，一名狗尾，與雄狐盧令皆匪人之比也，甚矣詩人之惡淫也。

古序曰：盧令，刺荒也。毛公曰：襄公好田獵，畢弋而不脩民事，百姓苦之，故陳古以風焉。

說曰：朱子改謂獵者相譽之詩，非也。齊襄公內荒于禽，詩人託田犬爲刺，猶雄狐之比，人類而行禽也。或疑不當以禽獸刺君，夫鳥獸

草木詩所取材也。非專刺也。雖關雎鵲巢羔羊鹿鳴美亦用之。所謂譎諫而無罪。正以此耳。美且仁。美其有人之德。仁也者。人也。美好也。黷好曰嫫。美其有人之貌也。有人之德。無愧于人之貌。無德而有其貌。走狗而已。

古序曰。敝笱刺文姜也。毛公曰。齊人惡魯桓公微弱。不能防閑文姜。使至淫亂。爲二國患焉。

說曰。此詩作于桓公遇害之後。故曰爲二國患。朱子改謂刺魯莊公。非也。莊公于文姜其

子也桓公則其夫也夫爲妻綱如笱制魚于
之於母猶曰弗克夫不能制妻則同敝笱耳
故敝笱刺夫猗嗟刺子序說各有攸當也笱
狗也魴防也魚目不閉曰鰈無妻者不寐亦
曰鰈鰈一名鱖首大身小魚之懦者也唯唯
慙慙之稱笱之制魚可入不可出敝則魚出
矣帷薄不脩之比也水族多淫淫義生于水
如雲如雨如水淫泆之比也

古序曰載驅齊人刺襄公也毛公曰無禮義故

盛其車服疾驅於通道大都與文姜淫播其惡於萬民焉

說曰朱子改爲刺文姜乘此車來會襄公蓋據詩中稱齊子不及襄公而稱齊子者明文姜本齊女耳國君而會婦人所以爲刺此魯桓公死後春秋書會禚會祝丘之類君夫人車翟茀此云簞茀則襄公之車來會文姜者甚明亟言魯道行人諷其無羞惡之心也

古序曰猗嗟刺魯莊公也毛公曰齊人傷魯莊

公有威儀技藝。然而不能以禮防閑其母。失子之道。人以為齊侯之子焉。

說曰。此詩刺魯莊公。較敝笱辭婉。所以為母及子也。妻淫而責夫。其言易直。母亂而責子。其語難顯。詩所以善於言也。每章猗嗟發嘆。歷數莊公之美。而所不足者。自見人以為齊侯之子者。春秋之義也。當世人疑莊公非桓公子也。春秋特書所生年月日。以折羣議。此詩云展我甥。明其非我子也。亦微諷之辭。

魏

說曰魏國未詳所始。後爲晉獻公所滅。以其地賜大夫畢萬。晉始有魏氏。魏唐之于晉猶邠鄘之于衛。其實皆晉風也。五霸晉繼齊故魏次齊。

古序曰葛屨刺褊也。毛公曰魏地陜隘其民機巧趨利其君儉嗇褊急而無德以將之。

說曰敦厚崇禮者下之美俗從容博大者君之美行也。魏地陜隘故其民機巧趨利而俗

鮮禮其君儉嗇褊急而德不弘然下之風俗
由于上之表率君無寬綽之度則民有纖嗇
之風故詩專刺褊心序說甚明朱子改爲縫
裳之女自作固也

古序曰汾沮洳刺儉也毛公曰其君儉以能勤
刺不得禮也

說曰勤儉美節也爲人君者不曠天工以爲
勤不奪民財以爲儉非勞手足茹蔬菜之謂
也人主而親細民之事以爲勤儉則并耕而

治數米而炊有如沮洳采莫之爲者矣沮洳泥塗也沾汙手是以求蔬菜非大人之事也居上纖嗇其狀類此不必真有采莫采桑之行亦不必卽是公路公行之官朱子改爲刺儉不中禮則是而謂刺公路公行則拘矣古序曰園有桃刺時也毛公曰大夫憂其君國小而迫而儉以嗇不能用其民而無德教日以侵削故作是詩也

說曰此詩之意謂國勢褊小而大國侵陵使

其君勿見小、勿自利、恢弘政教、鼓舞其民而
用之、猶可與立、乃硜硜自守、屯膏惜費、以爲
貧寡所當然、斗筭之見、何足與建大計乎、故
以桃棘爲比、家語孔子云、果屬有六、而桃爲
下、棘似棗而小叢生、孟子云、養其楨棘、則爲
賤場師、二物皆果實之賤者、生於園、其實幾
何、今欲以桃當肉、以棘當穀、數米而炊之道
也、以此用民、望其恢廓難矣、詩人所以憂也
○按此以上三詩、朱傳皆以首二句爲興、然

所刺之事卽在其中。若以興爲無義，則三詩皆未言儉嗇，以何爲刺？他可類推。

古序曰：陟岵，孝子行役，思念父母也。毛公曰：國迫而數侵削，役乎大國，父母兄弟離散，而作是詩也。

說曰：朱子改爲孝子行役，不忘其親，是矣。謂登山望父母而自言，非也。岵，山多草木，以比生我，屺，無草木，以比鞠我，岡，領也，以比長我。征夫何暇登臨？孝子思親，何待升眺？託言以

寓望鄉之情而已

古序曰十畝之間刺時也毛公曰言其國削小民無所居焉

說曰魏地迫隘其君褊急其民纖嗇加以大國侵削閭里蕭條民間愁居迫處覺生理之日蹙故詩人託采桑無所以刺之朱子改爲賢者不樂仕而歸農圃其辭疑似而其淺深厚薄之味相違遠矣讀者自別

古序曰伐檀刺貪也毛公曰在位貪鄙無功而

受祿君子不得進仕爾。

說曰朱子改爲美君子之不素餐非也所謂不稼穡而取禾不狩獵而縣貍此無功受祿之比嘆君子之不素餐所以刺小人也取禾塵庭縣貍皆小人貪鄙之象絕不似美君子之辭。

古序曰碩鼠刺重斂也毛公曰國人刺其君重斂蠶食於民不脩其政貪而畏人若大鼠也說曰朱子改爲民困於貪殘之政託言大鼠

害已而去之非也詩人託爲其民之言以刺其君耳非民自作也

唐

古序曰蟋蟀刺晉僖公也毛公曰儉不中禮故作是詩以閔之欲其及時以禮自虞樂也此晉也而謂之唐本其風俗憂深思遠儉而用禮乃有堯之遺風焉

說曰朱子改爲民間歲晚相與行樂之詩非也夫國奢濟之以儉國儉濟之以禮晉自僖

公之世俗尚固陋儉不中禮以蟋蟀比諷其
終歲廢禮也蟋蟀十月在堂周以十一月爲
歲首十月歲畢是大蜡之時也終歲禮樂不
止十月而歲暮猶寥寥則禮壞樂崩矣是詩
不必卽作于十月一歲之中朝廷有食饗宗
廟有獻酬邦國有賓興鄉有射里有社食以
時用以禮焉可以無財廢禮當時而廢樂也
禮樂先王所以和上下調人情勞身焦思以
天下爲桎梏是墨道也故詩人借行樂以廣

其儉而致太康之戒所謂禮滅而能進樂盈而能反致中和之道忠臣弼諧之語也里巷歌曲焉得有此朱子改爲民間歲晚行樂而以序刺僖公爲無據夫民間行樂苟無關於政不足以爲風變風所始其來舊矣孟子云王者迹熄而詩亡國風多幽厲以前之作則變風不始于各國中衰之諸侯而誰始乎盡斥爲無據不知又何所據也

古序曰山有樞刺晉昭公也毛公曰不能脩道

以正其國有財不能用有鐘鼓不能以自樂有朝廷不能洒掃政荒民散將以危亡四鄰謀取其國家而不知國人作詩以刺之也

說曰朱子改爲答前篇之意而解其憂非也蓋是時桓叔伐晉之謀已成而昭公齷齪自守所謂亡國之日迫以促詩人故爲放歌以諷之辭若舒而情實愁慘氣象危迫如朝露矣以爲解蟋蟀之憂豈不迂哉又謂此詩辭非臣子所施于君父夫風之作不知所自起

作者隱其端而聞者忘其譎故曰言之者無
罪若論臣子施于君父何但辭不可倨卽刺
又豈可乎蓋人有性情不能無好惡有好惡
不能無美刺有美刺其辭自不得不爾旣不
著作者之名又不撻君父之過若爲同儕自
語影響比譬何爲不可是故有雄狐碩鼠田
盧之喻而非詈有狡童狂且爾汝之呼而非
侮況子有宛死何嫌之有必如朱說欲明忠
厚之義而開世主惡謗之端詩人之志幾乎

窮矣

古序曰揚之水刺晉昭公也毛公曰昭公分國以封沃沃盛強昭公微弱國人將叛而歸沃焉說曰晉昭公分曲沃之地以封其叔父成師是爲桓叔桓叔彊而潘父弑昭公謀納桓叔不克晉沃交攻再傳沃莊伯至於武公遂併晉事見春秋傳此託爲國人從沃之辭刺昭公之失民也朱子改爲叛者自作豈有民叛其主旣云不敢告人而又作詩以自明者乎

有國家者使其民從敵爲樂而且爲之隱諱
國欲不亡得乎自古亡國民心貳而後敵人
乘之段之叛鄭也國人先美之突之逐忽也
國人先去之沃之叛晉也國人先從之詩皆
以爲刺而聖人皆存之所以爲萬世長民者
戒也

古序曰椒聊刺晉昭公也毛公曰君子見沃之
盛彊能脩其政知其蕃衍盛大子孫將有晉國
焉

古序曰：紉紉，刺晉亂也。毛公曰：國亂則婚姻不得其時焉。

說曰：朱子改爲男女失時而後得遂其婚姻。詩人述其相喜之辭，非也。本爲不得婚而無可奈何之辭耳。當晉沃構亂，民間室家流離，詩人託言男女相見無聊之情如此。薪之言，新也。男女之初也。夫婦牒合也。斧析木，束以爲薪，媒聯異合以爲耦。匪斧不克，匪媒不得也。親迎以昏，三星，心星也。卽大火也。上一下

二其形如心東方蒼龍之宿又三參也參七星中三上下各二西方白虎之宿參以孟冬之昏始見于東方是曰在天季冬之昏見于東南是曰在隅正月昏見于南方是曰在戶古者自九月霜降至二月冰泮皆婚姻之期故舉參爲候至三月心星出矣昏見于東五月昏見于東南隅六月見于南方當戶七月以後西流九月之昏西伏戌位而參始東出心東出則參西退心出參退而昏禮終參出

心退而昏禮始故以爲比芻言阻也楚言愁也皆失意之比

古序曰杖杜刺時也毛公曰君不能親其宗族骨肉離散獨居而無兄弟將爲沃所拜耳

說曰朱子改爲人無兄弟者求助于人之辭非也晉自昭公被弑與沃五世相攻宗族離叛公室孤立故詩人以杖杜比杜棣類好生道旁以比疎屬棣之言悌也其華合聚以比同宗實甘者爲棠以比兄弟相親也酢者爲

杜杜塞也。以比兄弟不相能也。杖杜孤立。以比晉。椒聊蕃衍。以比沃一盛一衰。以比晉將折而入于沃也。如王風葛藟。鄘風揚之水。皆親族畔之所以不振。安得目爲泛泛行道之語乎。

古序曰。雋策刺時也。毛公曰。晉人刺其在位不恤其民也。

古序曰。鵲羽刺時也。毛公曰。昭公之後。大亂五世。君子下從征役。不得養其父母。而作是詩也。

說曰。晉自潘父弑昭侯。納桓叔。不克。晉人立
孝侯。曲沃莊伯又弑之。晉立鄂侯。莊伯又伐
而逐之。平王命虢侯伐曲沃。立哀侯。曲沃獲
之。晉立小子侯。曲沃誘殺之。王又命虢仲立
哀侯之弟緡。此所謂大亂五世。而詩稱王事
靡盬者也。鵠似鴈而大。無後指。爾雅云。鳬鴈
之醜。其足蹠以比君子。不任奔走也。叢生曰
苞。集于苞。其栖卑矣。勞則思集。大鳥集于叢
木。失所之比也。栩言虎也。棘言急也。桑言喪

也皆以比時政也

古序曰無衣美晉武公也毛公曰武公始併晉國其大夫爲之請命乎天子之使而作是詩也說曰晉武公者曲沃桓叔之孫莊伯之子也伐晉侯緡滅之使其大夫賂周釐王王使虢叔錫武公服爲諸侯其大夫因王使來作是詩以美其君而稱子者指王使言也宋子改爲武公自述謂序云美爲獎亂夫序云美非水風者美之也非刪詩者美之也武公之臣

自美武公耳。猶秦風之車鄰四驥云爾。聖人刪詩。豈必可者乃存之。不可者遂去之乎。亂臣賊子。事有不可存之。以告來許。垂永戒之義也。若謂此詩獎亂。不可以爲教。則自二南以下。諸變風多矣。春秋十二公所書亂跡亦多矣。其皆可以爲教者。歟。存無衣。乃其所以爲教也。

古序曰。有杕之杜。刺晉武公也。毛公曰。武公寡特。兼其宗族。而不求賢以自輔焉。

說曰朱子改爲人好賢而恐不足以致之非也武公兼併晉國內與宗室爲讐賢人君子去之故詩人託孤杜爲刺尊賢親親禮之經也仁者人也親親爲太義者宜也尊賢爲太未有不仁而能義不親其親而能尊賢者也古序曰葛生刺晉獻公也毛公曰好攻戰則國人多喪矣

說曰朱子改爲婦人以夫父從征後作非也晉獻公好戰伐虞伐虢伐驪戎國人多陣亡

詩託死者妻悼亡以刺之。故其辭哀而傷矣。
葛生藟蔓。指死所也。尸膏草野。失其骸骨。故
曰亡也。域塋域也。居室墓壙也。陣亡不得殯
葬。百歲之後。竟歸于居于室耳。皆哭死飲恨
之辭也。角枕錦衾。斂襲之具也。周禮天官大
府之職。大喪供角枕。儀禮斂用衾。若謂夫婦
宴寢之具。則委巷之語矣。

古序曰。采芩刺晉獻公也。毛公曰。獻公好聽讒
馬。

說曰朱子改爲聽讒之詩。謂未見其果作于
獻公之時。非也。事之可據。孰有如晉獻公之
聽讒者乎。猶謂不足信。則詩須有年月日時
作者姓名。乃可耳。各章首二語。讒言。併張之
比也。苓。木耳。比聽也。苦。辨其味也。薺。拔其根
也。

秦。

說曰。觀于序詩。而知聖人之先見也。晉亡而
秦興矣。或曰。唐堯風亡。夷狄乘之。非也。夫秦

地。卽岐豐之地也。秦民卽岐豐之民也。何得
爲。美秦荀夷也。陳檜嘗諸夏。反後夷乎。

古序曰。車鄰。美秦仲也。毛公曰。秦仲始大有車
馬。禮樂侍御之好焉。

說曰。按秦自非子始封爲附庸。非子曾孫秦
仲。入爲周宣王大夫。禮天子之大夫視伯。于
是始有車馬。寺人與諸侯同。故秦人創見而
誇美之。朱子謂未見其必爲秦仲之詩。非也。
古序曰。駟驥美襄公也。毛公曰。始命有田狩之

事園囿之樂焉

說曰朱子謂此亦前篇之意非也按史秦仲
生莊公莊公生襄公犬戎殺幽王襄公將兵
救之戰有功及周東徙襄公以兵送之平王
遂命襄公爲諸侯盡以西京地予之前篇秦
仲猶附庸也故但誇其車馬禮樂侍御此則
爲大國矣故美其園囿田獵序說各有攸當
也○誦秦風多猛厲之氣所以虎視諸侯吞
併六國而亦竟以暴亡聲音之道可以知德

矣。

古序曰。小戎。美襄公也。毛公曰。備其兵車以討西戎。西戎方彊而征伐不休。國人則矜其車甲。婦人能閤其君子焉。

說曰。朱傳云。西戎者。秦之臣子所與不共戴天之仇也。襄公上承天子之命。率其國人往而征之。故其從役者之家人。先誇其甲車之盛如此。而後及私情。蓋以義興師。婦人亦知勇於赴敵而無怨也。按此論甚正。然實非夫

子錄小戎之本意錄小戎非嘉之也秦人好戰雖婦人女子見車馬旌旗而喜其習尚固然時商鞅白起輩未生而小戎爲之兆矣聖人前知如神序所以爲確也若夫犬戎殺幽王與秦仲雖義不共天而秦人好戰本非待此詩託興婦人朱子遂謂婦人自作皆非也古序曰蒹葭刺襄公也毛公曰未能用周禮將無以固其國焉

說曰朱子謂此詩未詳所謂以序說爲鑿非

世周道親親尚賢平易而忠厚黜詐力而卑
武功自文武及宣幽國于岐豐民習先王禮
教者數百年矣平王東遷秦襄公據有其地
始以攻戰爲事刑殺爲威其民愁居懾處思
昔日太和景象不復可見東望河洛有游從
宛在之思西視秦邦有艱難牽掣之苦文武
成康之澤維係民心而秦人慘礪之法束縛
其手足自立國之初然矣毛公所以謂之將
無以固其國也蓋周之興也詩歌苗裔是春

和之明景也。周禮行而忠厚篤祜。開卜世有
道之長。秦之興也。詩歌薰葭。是肅殺之蕭晨
也。周禮廢而強梁腊毒。兆二世撲滅之禍。聖
人剛定法戒。昭然後儒不達。詆爲鑿空。豈不
誤乎。

古序曰。終南。戒襄公也。毛公曰。能取周地。始爲
諸侯。受顯服。大夫美之。故作是詩。以戒勸之。
說曰。朱子改爲秦人美其君之辭。亦車鄰駟
驥之意。非也。按此詩美而寓戒。稱其顏色。而

諷以其君。頌其佩服而教以不忘。非徒誇美之而已。終南。鎬京面山也。條言條理也。梅言謀也。紀作杞。堂作常。棣也。杞之言紀也。常之言綱也。代理謀謨。陳紀立綱。皆脩政之比也。古序曰。黃鳥哀三良也。毛公曰。國人刺穆公以人從死而作是詩也。

說曰。秦染西戎惡俗。輕生好殺。君葬用人。殉武公之葬。從者六十六人。至穆公用百七十七人。子車氏之三良與焉。然詩人不刺康公。

而刺穆公何也。三良之殉，穆公之志也。嗣君
因先世遺風，重以厥考之命，自非賢哲，焉能
獨已。使穆公有治命，能革其故，自可無此舉
矣。平生悔過作誓，思以賢才遺子孫，身死而
自殲其善類，詩人所以惡之也。厥後始皇崩，
今後宮皆從死，工匠皆生閉墮中，遺謀不善。
子孫好暴，遂以族滅。聖人刪詩存黃鳥，脩春
秋不卒穆公，蓋惡之也。黃鳥知時，以比賢哲。
棘急也，桑喪也，楚愁也，不當止而止，以諷三

子也使三子知幾則可無及於難臨穴而懼雖百贖不可得已

古序曰晨風刺康公也毛公曰忘穆公之業始棄其賢臣焉

說曰朱子改爲婦人念其君子之辭非也凡詩思念稱君子者輒以爲婦人則是男子盡無思而君子獨婦稱其夫乎亦固矣晨鷓同鷓也搏擊羣鳥其疾如風秦俗好戰士以猛摯爲賢故以爲比臣擇君如鳥擇木木向陽

者茂而北林蕭索。鷹鷂在野則驚而遇林則阻。櫟與棣皆大木而苞叢生樹大者其皮斑駁。櫟在山者苞在隰者六駁則大木羅列矣。棣在山者苞在隰者樹棣則喬林矣。皆賢人失所之比。

古序曰：無衣，刺用兵也。毛公曰：秦人刺其君好攻戰，亟用兵而不與民同欲焉。

說曰：朱子改爲秦俗樂于戰鬪，其人平居相謂之辭，非也。其君平居不能惠民，假王命復

仇以日從事于干戈。語曰。食人之食者。事人
之事。樂人之樂者。憂人之憂。君不與民同欲。
而責其死力。難矣。所以刺之。

古序曰。渭陽。康公念母也。毛公曰。康公之母。晉
獻公之女。文公遭驪姬之難。未反。而秦姬卒。穆
公納文公。康公時爲太子。贈送文公于渭之陽。
念母之不見也。我見舅氏。如母存焉。及其卽位。
思而作是詩也。

說曰。朱子改爲秦康公爲太子。送舅渭陽而

作非卽位以後之詩非也詩三百編次與尚書二十八篇世代先後井然此詩居黃鳥晨風後其爲康公卽位以後詩甚明也故古序不曰太子送舅而曰康公念母其旨自遠蓋有母而後有舅念舅所以念母其送舅也本因念母之情故其念母也追憶送舅之事若送舅則太子時作若念母則不應以念母詩爲送舅詩也定知此詩不作于渭陽送別而作于重耳旣卒之後康公卽位重耳卒已七

年矣。追思昔日見舅如母。今母不見而舅亦亡。不忍直言思母。而但追憶送舅生死別離之感。惻然於言外。渭陽所以千古含悲也。苟無序說尋常餞別語耳。序所以爲詩之根抵。不可易也。

古序曰。權輿。刺康公也。毛公曰。忘先君之舊臣。與賢者有始而無終也。

陳

說曰。諸國自秦已上。次第可推。自陳以下。三

國最小先亡故附及之

古序曰宛丘刺幽公也毛公曰淫荒昏亂游蕩無度焉

說曰朱子改爲國人見此人常遊于宛丘之上故序其事以刺之若是則民間自相刺也夫風行自上始國人遊蕩何關君德而以首陳風乎非也

古序曰東門之粉疾亂也毛公曰幽公淫荒風化之所行男女棄其舊業亟會于道路歌舞于

市井爾。

說曰朱子改爲男女聚會賦其事以相樂非也男女淫樂必不肯自宣其醜不績其麻市也婆娑此疾亂之辭甚明也東門國門也紛言紛衆也栩言許多也二章言市都市也三章言駸人叢集也猶齊風之言魯道行人皆以羞惡諷之也子仲女氏也南方女居也原女姓也穀旦良時也績麻女業也諷其失時廢業也婆娑放浪不檢非女之容也如菽

貽椒相諛之辭也。收蕎麥其子觚稜翹然不相合也。椒子圓滑其芳易襲始若收而終若椒比淫女始違終見從也。猶衛桑中之期送與鄭溱洧之贈謔皆詳暴其事以諷之所以爲刺也。

古序曰衡門誘僖公也。毛公曰愿而無立志故作是詩以誘掖其君也。

說曰朱子改爲隱居自樂無求者之辭。又曰僖者小心畏忌之名。序以爲愿無立志而配

以此詩耳。按諡法。小心畏忌曰僖。此詩殊無小心畏忌之意。何緣強配僖公。詩實似賢者隱居。何不以秉政不任賢之諡配夷公。尤明切乎。夷之去僖甚近也。古人序詩。不察源委。而但以諡法強配。欺天下後世。無是理也。朱子說詩。極其淺率。而詆序極其深刻。甚可怪也。蓋陳本小國僖公。愿謹無爲。詩人遷就誘掖。因器勸成耳。如孟子云。滕雖褊小。猶可以爲善國。云爾。詩人卽其所自處。以比。故似隱。

者之辭。○按魏地陝隘其民纖嗇而其君褊急故詩人望其君以恢弘陳地廣平其民游蕩而其君愿謹故詩人誘其君以立志卒之晉強于諸侯而陳終于不振故國不厭小俗不厭儉君不厭愿存乎自强耳詩可以觀矣古序曰東門之池刺時也毛公曰疾其君之淫昏而思賢女以配君子也

說曰朱子改爲男女會遇之辭非也水性流蕩而池水湛靖以比賢女幽貞也麻紵管以

比君德昏亂也。詩人惡淫女，思淑姬，猶小雅車牽之思季女也。晤，相對不寐也。歌以善道諷詠也。語言以善道相告語也。君德不淑而致望于內助，無俚之至也。所以爲刺。

古序曰：東門之楊刺時也。毛公曰：婚姻失時，男女多違，親迎女猶有不至者也。

說曰：此詩與鄭之丰，事類而其刺同。楊有葉冰泮後期也。朱子改爲男女期會負約之辭。暮夜郊外，林莽相期，唯恐人知，又自詩以傳。

平非情也。

古序曰墓門刺陳佗也。毛公曰陳佗無良師傅。以至於不義。惡加於萬民焉。

說曰按春秋魯桓公五年陳文公病。庶子佗弑太子免而自立。國人大亂。佗奔蔡。蔡人殺之。此詩刺佗無良。由無賢師傅也。自古貴戚驕奢。皆由羣小導之。鄭段與國人狎而作亂。陳佗與不良人處而弑君。垂戒遠矣。墓門凶僻之地也。棘言急也。梅言迷也。鶚惡鳥也。以

比凶人。朱子謂序出陳國無事可紀。獨陳佗作亂。以是詩與之。非也。夫事孰有大于弑君者乎。陳之有佗。猶衛之有州吁。鄭之有叔段。皆大故也。采風而無刺。奚貴爲風。故陳風之墓門。猶衛之終風。與鄭之叔于田。云爾。序不可易也。

古序曰。防有鵲巢。憂讒賊也。毛公曰。宣公多信讒。君子憂懼焉。

說曰。讒賊者。讒言賊害人也。各章首二句。比

讒言防邛皆地名也。凡草秀曰茗。堂下曰唐。鵲巢茗皆常有之物。而遠指防邛猶采苓之言首陽也。廟中路本砌甃爲之。草有鷓鴣鳥亦有鷓四者皆疑似併張之言。故以比讒言也。朱子改爲男女有私而憂或問之非也。以予美爲男子則簡兮爲怨女矣。以予美爲婦人則離騷爲曠夫矣。從序則此詩爲忠憤。從朱則此詩爲閨思。聖人刪訂之義宜何從乎。子古序曰。月出刺好色也。毛公曰。在位不好德而

說美色焉

說曰詩本刺好色而毛公云在位不好德蓋人主之心所好在此則所輕在彼孟子云其爲人也多欲雖有存焉者寡矣子云吾未見好德如好色者齊民好色亦職惟疾爲人上而無德何以先民下之淫風由于上之倡率也故詩呼月出以警在上月主陰而司昏俾夜作晝以比女色也匪才匪德一佞人耳反覆思念至于勞心輾轉不已所以爲刺朱子

改爲男女相悅相念之辭。味索然矣。

古序曰：株林，刺靈公也。毛公曰：淫乎夏姬，驅馳而往，朝夕不休息焉。

說曰：陳大夫夏御叔娶于鄭穆公女夏姬，生子徵舒。南卽其字也。御叔蚤死，陳靈公與大夫孔寧、儀行父皆通于夏姬。徵舒惡之，弑靈公。此詩託爲國人刺公，而朱子因改爲民間相語之辭，非也。株林，夏氏邑。短木曰株。易曰：臀困于株木。君臣聚淫，所以困也。

古序曰澤陂刺時也。毛公曰言靈公君臣淫於其國男女相說。憂思感傷焉。

說曰朱子直以爲男女之辭非也。極道其相悅相念。所以爲刺耳。淫義生于水。故以澤爲比。蒲荷藺菡萏皆柔弱浸淫之物也。水草相依。以比男女相狎。憂思至于悲傷涕泗寤寐不忘俗之所由來者漸矣。

檜

古序曰羔裘大夫以道去其君也。毛公曰國小

而迫君不用道。好潔其衣服。逍遙遊燕而不能
自強於政治。故作是詩也。

說曰。朱子謂檜君好潔其衣服。逍遙遊宴。故
詩人憂之。此又拘毛說之過也。古序云。大夫
以道去其君而已。好潔衣服。毛公解詩中文
字。而詩不爲潔衣服作也。檜君之過。不在潔
衣服。大夫所爲去。亦不以潔衣服。特以逍遙
不能自強。故以衣服爲比耳。言服飾之外。都
無所事云爾。猶曹風之蜉蝣也。

古序曰素冠刺不能三年也

說曰禮父母喪必三年始死疏衰苴經杖期
年外一月小祥以練熟麻布爲衣冠再期外
一月大祥又間一月禫而服除實不計閏二
十七月上下同也周衰禮廢三年之喪不行
如春秋諸侯居喪而親迎盟會戰伐大夫以
下可知已故詩人刺之素冠卽練冠能練冠
則能三年矣

古序曰隰有萋楚疾恣也毛公曰國人疾其君

之淫恣而思無情慾者也。

說曰朱子改爲政煩賦重民苦而作非也。萋楚之言長愁也。凡人情累生于有知成于有室。苟常如童赤無知無室家則何累之有。萋楚始生自立盈尺以上蔓延草上人壯而有室多累似此故以爲比。○是詩與唐風十畝之間朱說皆極似。所謂讀詩易簡直訣如此。所以不及古序者風人之志深厚微婉則得之而淺率直遂則失之矣。故夫善說詩者不

以辭也、

古序曰匪風思周道也毛公曰國小政亂憂及禍難而思周道焉

說曰朱註以周道爲適周之路謂序未達非也詩言顧瞻者雖適周之路而意之所託則周道方盛之時也王綱振肅無侵陵之患比其衰也小國失恃故曰中心怛兮所以瞻行路而思王道耳風發車偈亂世搶攘之象也

曹

古序曰：蜉蝣刺奢也。毛公曰：昭公國小而迫，無法以自守，好奢而任小人。

說曰：蜉蝣之言浮游也。放浪不檢，無法守之。比蜉蝣小蟲，朝生夕死，國小而迫之比也。衣裳文采，好奢之比也。羽翼任小人之比也。危亡將至，故曰無所依。朱子以爲刺昭公無可考，改爲刺時人玩細娛而忘遠慮者，不知又何所考也。

古序曰：侯人刺近小人也。毛公曰：共公遠君子。

而好近小人焉。

說曰。朱子謂序以三百赤芾。附合春秋左傳。晉文公入曹之事。遂以爲共公。非也。按詩序。本國史之舊目。聖人因而刪定。其來遠矣。左傳出後人之手。叙重耳入曹。數其不用僖負羈。乘軒者三百人。襲此詩三百赤芾語。其實誤也。蓋諸侯之大夫。不過五。以曹之蕞爾。舉羣臣不能三百。而況大夫乎。言三百者。極道其濫耳。故曰。說詩不以辭害志。若雲漢則周

之民無予遺若侯人則曹之大夫有三百鳥
可以辭徵也左傳引此屬文非重耳真有此
言也宋子反疑序說爲附合左傳不倒見乎
古序曰鳴鳩刺不壹也毛公曰在位無君子用
心之不壹也

說曰朱子改爲美君子用心均平專一非也
詩因美以見則子警在位者之不
然猶以風之羔裘小雅楚茨之類民風不醇
猶上無身教下無表率也故君心以至誠純

一鳥本天下不見君子之心而見君子之儀
卽儀可以徵心物性誠一無如鳥之哺子鵲
鳩每生七八子哺之如一月令季春戴勝降
于桑鵲鵲首有幘名戴勝喜食桑葚初夏桑
葚熟則鵲鵲子飛氓之篇曰于嗟鵲兮無食
桑葚是也以鵲鳩比見人不如鳥所以爲刺
古序曰下泉思治也毛公曰曹人疾共公侵刻
下民不得其所憂而思明王賢伯也

說曰朱子謂曹無他事可考序因侯人遂以

爲共公天下大勢非共公之罪非也按詩先後自有定序此詩之爲共公舊矣不卹其民而使民憂思安得無罪事雖不獨曹而詩作自曹卽爲曹風矣豈得以天下大勢誘之泉水寒冽不能生物比國政侵刻也田無五穀惟稂與蕭比閭閻蓬蒿無力供誅求也是以有明王賢伯之思焉○按風至曹而王迹熄矣春秋所以作也故詩人念周京哀四國思明王與賢伯焉是時晉重耳始霸執曹君分

曹地。要王饗醴。策命爲方伯。天下有天子。而後有方伯。無天子而方伯制命。專征伐。所以大亂也。故曰四國有王。郇伯勞之。無王焉。得有伯。春秋書晉侯入曹。執曹伯。畀宋人。與詩詠下泉。刪詩終曹風。義正同。惟知春秋者可與言詩。故曰詩亡春秋作。千載知言。孟氏一人耳。後儒樊霸尊晉。烏足與言詩。

豳

說曰豳周之始國也。風首二南而終豳者。豳

爲周道之始。二南周道之成也。守成者原其
始。始則終變。撥亂者反其終。終則復始。文王
基始。周公代終。周道之全也。變風而終以周
公。剥則思復也。然則周公之詩。何不遂以爲
魯。周公未嘗一日居魯也。成王尊周公。而不
以爲臣。魯本臣。而因周公以自尊。故聖人存
魯頌。不列魯風。魯僭而以風爲頌。王降而以
雅爲風。一也。然則豳何不遂以爲雅乎。蓋公
劉草創區區。未足比諸侯。而焉可以爲天子。

稱風本其舊也。然則鴟鴞以下，非豳屬豳。又何也？皆西人之詩，而周公之事也。周公老于周，而魯無風可繫，進不敢附于周南，故退而繫之豳也。後天下者，周公之心，不忘先業者，周公之志，非聖人孰能定之。

古序曰：七月，陳王業也。毛公曰：周公遭變，故陳后稷先公風化之所由，致王業之艱難也。

說曰：朱子改爲周公，以成王未知稼穡之艱難，作此戒之，非也。若是，則朝廷之獻納宜屬

雅。今與東山鷓鴣同繫國風之末。則周南之變耳。聖人而遭兄弟之謗。庸非變歟。人情艱則思危。勞則反本。履泰則驕。思先則懼。昔者周先公之始造。幽也勤。以力本。儉以制用。豫以趨時。孝以養老。忠以奉君。慈以育衆。陰陽日月寒暑必按其節。昆蟲草木榮枯必審其時。祭祀燕饗興作勞逸必謹其禮。敬天勤民教養休息數百年而後成文武之業。若此其艱難也。二叔不類。有忝式穀。成王以嗣子大

弗克恭。不寬綽厥心。講張于小人。而疑忌師保。是時紂子未殄。東方多難。西土人不靜。國家之事。未可知也。故公陳先世憂勤以告王。使克念爾祖。勿忘艱難。亦人情疾痛呼父母之意云爾。○或問七月與篤公劉風雅殊何也。蓋七月民事。篤公劉君事也。然則周禮春官籥章祈年吹豳雅。蜡祭吹豳頌何也。蓋此詩歌于朝廷。亦可爲雅歌。于祭祀亦可爲頌。鄭康成謂如采桑之女。感時思歸風也。春酒

介眉壽雅也。稱觴祝君。頌也。朱元晦不然之。而以楚茨諸詩當豳雅焉。

古序曰。鴝鵒。周公救亂也。毛公曰。成王未知周公之志。公乃爲詩以遺王。名之曰鴝鵒焉。

說曰。武王崩。成王立。周公爲相。使其兄管叔鮮監紂子武庚治殷。管叔將以殷畔流言于國。曰。周公將不利于孺子。王心疑公。公告太公召公曰。我之弗避。無以告我先王。乃避位。居東二年。管叔叛。王執而誅之。心猶疑公未

釋也公乃作此詩自東以貽玉首章呼鴟鴞
比武庚也取我子比武庚陷管叔于死也二
章未雨綢繆比武庚尚在東方未寧勸王早
圖也三章以後皆自明已志然序不言公自
明而曰公救亂何也是時成王幼冲國家新
造紂子未殄奄徐外叛故公作此詩悟王不
知公者謂公自明而知公者謂公救王室與
天下也大哉序言非明社稷之計諒聖人之
深衷者孰能作之朱子謂以金縢爲文有據

而不知以金縢爲文者。毛氏解序之說也。序云周公救亂者。雖金縢亦未之及也。又謂此詩周公東征二年誅管叔武庚而作。按書居東。非東征也。誅管叔者成王。非周公也。管叔雖誅。而武庚尚在。是詩作于成王殺管叔之日。公尚居東未歸。而東征則公歸之後矣。朱子誤于漢儒周公殺兄之說。漢儒又誤于孔書蔡仲之命。孔書又誤于解金縢弗辟之語。承訛習謬。使聖人蒙千古不白之冤。以迄于

今愚于書金縢大誥諸篇辨之詳矣○誦鴟
鴟而知周公於是始有東征之志矣昔武王
誅紂封其子罰弗及孥仁也及管叔以武庚
叛奄徐諸國亦叛則殷周之不兩立天下之
定勢也況管叔誅矣武庚獨可免乎故以鴟
鴟比之始視紂子爲不祥之物歸而遂有東
山之師耳

古序曰東山周公東征也毛公曰周公東征三
年而歸勞歸士大夫美之故作是詩也一章言

其完也。二章言其思也。三章言室家之望汝也。四章樂男女之得及時也。君子之於人。序其情。閔其勞。所以說也。說以使民。民忘其死。其唯東山乎。

說曰。周公避謗居東二年。成王既誅管叔。得公。鴟鴞之詩。又感風雷之變。始悔而迎公。公既歸。乃大誥天下。奉成王以東征。武庚遂伐奄。孟子所謂三年討其君。滅國五十者。卽此行也。大亂既殄。士卒生還。閭閻安堵。皆公所

以振溺亨屯而躋之安全者也故周大夫作
是詩亟道其使民忘勞而公之忠勤盡瘁神
武不殺皆隱然於言外可謂善頌矣而朱子
謂爲公自作以勞歸士如采薇杖社之類則
仁人之言不待公而能矣況可以風而亂爲
雅乎

古序曰破斧美周公也毛公曰周大夫以惡四
國焉

說曰朱子改爲征士答前篇周公勞已而作

非也。朱子于凡詩義相似者，輒以後爲答。前
斧斨似兵，破缺似戰，故以破斧爲答東山。然
使東山之戰，至于兵器破缺，則殺人多矣。豈
褒美之辭歟？詩言戎器惟車馬弓矢戈矛，而
斧斨以析薪伐木，王室有公，辟解盤錯，猶之
斧斤也。因以爲比。司馬法輜輦載一斧一斤，
一鑿一耜，一鋤二版，二築皆軍中樵蘇築壘
用之。故次章缺錡，錡金屬，所以爨也。采蘋云
于以湘之，維錡及金是也。三章缺鉞，鉞鑿之

屬皆任用之器。朱傳謂爲兵器誤矣。

古序曰：伐柯美周公也。毛公曰：周大夫刺朝廷之不知也。

說曰：朱子改爲周公居東，東人喜見公而作非也。管叔旣死，鷓鴣旣作，公尚畱滯東土，成王感風雷之變，乃執金縢之書，泣曰：惟朕小子其親逆我國家禮，亦宜之。王意欲親迎公而未果者，悔往事之錯謬，恐公意未釋而踟蹰，所以迎公之禮，以小人之腹爲君子之心。

耳不知聖人天地之量其見疑也奚以懟其
既明也奚以喜既不以蒙難而失常豈以既
明而求雪詩人諒公之深贊王親迎以伐柯
娶妻比伐柯用斧娶妻用媒古有是語冕而
親迎重其事也故借以諷王而其言微婉苟
無序將以是詩爲婚禮而作矣

古序曰九罍美周公也毛公曰周大夫刺朝廷
之不知也

說曰前篇諷成王以饗禮迎公此篇諷王以

冕服迎公。朱子改爲周公居東。東人喜之而作。非也。夫居東。公之不幸也。不以朝廷失公爲憂。而以東人見公爲喜。其于君子立言大義。近兒女私情。謂周大夫託東人愛公。諷王則可。謂東人喜之而作。則謬矣。九罭。九罭。大網物。莫大於魚。魚大則網恢。九罭之言。九域以比天子。羅致大臣也。鱄魴。皆魚名。鱄之言。忖。魴之言。方。忖度所以挽回公之方也。蓋王悔始之失公。而蒔人諒公之忠順。惟勸王還。

其舊服而已矣。上公衮冕，卽冢宰之服也。鴻飛比公去位高蹈也。遵渚遵陸，比二年居東也。一章謀所以迎公之禮。二章三章揣公必歸而託爲辭。東人之語。四章迎公西歸而託爲東人留公之語也。是時公居東已二年，信處信宿，諷王之速迎公也。蓋王雖不諒公，而公終未忍忘主，往迎則必反，故東人悲公歸而朝廷不恤公去。詩所以歎其不知而表公之盛德精忠，無絲毫怏怏懟主之情。其辭義

懇惻微婉至矣。○余誦九罭而知聖人忠愛之無已也。臣之事君無所逃於天地之間。始以王見疑而去。負罪引慝。人臣自靖之分也。苟君能諒臣之無他。則懽然相與棄其舊而圖其新。豈復有纖芥不釋之憾乎。詩人所以深知公而託詠于九罭之魚也。爲人臣者。師周公可矣。

古序曰。狼跋。美周公也。毛公曰。周公攝政也。遠則四國流言。近則王不知。周大夫美其不失其

聖也

說曰美聖德而言豺狼者才良之寓言也狼行顧其後比公去國未忘王室也狼性怯走善還比公居東西歸也世稱顛連曰狼狽冗亂曰狼籍播棄曰狼戾放散曰狼宕皆患難之比也○誦狼跋而知世路嶮巇自古然矣聖如周公而猶不偶士宜何如自處邪有大美而能讓焉庶其免矣孔子溫良恭儉讓故雖老於行日尊以光使憂能傷人周公孔子

何以自全乎詩可以觀其斯之類矣。

毛詩序說卷之三終